



CM	0	1	2	3	4	5	6	7	8	9	10	11	12	13	14	15	16	17
Lab D50 2°	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	40/9/-43	52/48/17	82/4/79	51/50/-13	50/-28/-29					
	38/14/16	66/16/18	50/-5/-22	43/-14/21	55/-9/-25	71/-32/0	62/34/60											

T2266/8234

CHINESE-JAPANESE LIBRARY
OF
HARVARD-YENCHING
INSTITUTE



AT
HARVARD UNIVERSITY

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 5 1941

蘇
業
金

濟美錄

美錄序

美莫難于世矣。鄭村鄭之先有曰

公。宋亡之明年。以一言解死。人居

於此。名其人。而其人。今

名其人。而其人。今

名其人。而其人。今

名其人。而其人。今

名其人。而其人。今



濟美錄序

嗚呼美莫難于世矣鄭村鄭之先有曰
安者當宋亡之明年以一言解元人屠
城之師卒令于歛歛之人廟之號曰令
君乃有子曰千齡卒于休寧令有廉節
部使者以貞白名其里乃有孫曰玉以
道德文章名天下學者稱師山先生卒
以忠義傳元史從祀朱子祠里有師山

哈佛大學漢和
圖書館珍藏印

書院特祀焉祖孫父子賢賢相承備茲
錄矣故世濟其美云梓成視訓訓讀者
再仰惟令君以功貞白以德美哉洋洋
乎不朽於世矣乃若先生又以言焉而
德固懋而功亦懋後生乃有疑于死元
元固也非先生之君乎元以待制徵
也雖固辭之若酒與幣則受之矣表謝
于元一則曰陛下二則曰陛下可謂非

先生之君乎君臣之義無所逃于天地
之間可以其君之也而廢之乎可以
其君之也而廢之則亦可以其君之
桀也而廢之可以其君之紂也而廢之
爲夷齊之道者何義于太公仁于孔子
乎疑者於是焉過矣側聞先民有言先
生之死盖守微之將見之不以其禮也
見之以禮先生可以無死吁可以無死

無可以臣前乎先生有箕子焉爲箕子
之道者訪洪範則可仕則不可後乎先
生有環谷焉爲環谷之道者聘修史則
可仕則不可環谷嘗貢于元矣猶先生
徵于元者也夫既無可以臣乃不訪不
聘至辱焉使仕先生可以無死哉可以
死則死者義也致命遂志於是焉成仁
矣開國寧河之祭所謂太公者非耶爲

孔子之徒者惡能已於言哉先生以道
德文章名天下無間然矣卒以忠義傳
元史是泰山一死大有功於名教也不
朽于世備矣茲錄也盖有世爲天下道
者存焉豈惟世鄭之美而已訓惡能已
於言謹序

嘉靖十四年乙未九月望兵部郎官前
進士鄉後學黃訓拜書

蘇士傑鄭君黃鵬秩書

真龍十四平心朱木八

水言鐵氣

香林高覽

天定長泰山一頂大

外文章公天下無間

下下之卦



濟美錄目錄

卷之一

郡誌聞見紀

郡誌鄭安傳

授鄭安尹歛縣牒

再授鄭安尹歛縣牒

追封鄭安牒

歛令鄭君墓道之碑

鄭令君廟碑

建立鄭令君廟榜

洪杏庭

朱禮侍

朱禮侍

揭傒斯

程文

彭文忠

徽州路祭文

徽州路萬戶府祭文

時祭祝文

卷之二

郡誌鄭千齡傳

郡誌宦業傳

祁門縣宦蹟類

文獻志貞白先生鄭公行狀

改善福里為貞白里帖

貞白里門碑

朱禮侍

汪靜軒

程敏政

許敬

揭傒斯

又

徽州府學檢舉鄉賢追崇祀典申文

應東白

程黥南

卷之三

元史忠義傳

師山先生鄭公行狀

宣命

先兄翰林仲十四師山鄭先生壙誌

生日祭文

宋濂

王克寬

璉

孟崐

濟美錄目錄
重建師山書院祭文

孟淑

卷之四

郡誌紀

授鄭璉婺源縣太白渡巡檢劄付

行樞密院保鄭希貢尹欵咨呈淝江行中書狀

樞密院陞行軍鎮撫鄭璉尹欵照會

元故欵尹希貢鄭先生墓誌銘 潘從善

濟美錄目錄終

濟美錄卷之一

郡誌聞見紀

洪杏庭



哈佛大學漢和
圖書館珍藏印

欵爲附郭縣當鼎革之際李銓納欵尋入覲已而行
省差總管忽都歹至郡調其裨將李世達所部兵往
戍瓜洲於是世達爲叛省遣萬戶李木魯敬提重兵
壓境世達以千戶潘興逆戰敗而走時城中無人惟
立龍友與鄭安相繼出迎極言於敬謂亂由兵非百
姓罪乞免屠戮因權署龍友充本路同知署鄭安知
欵縣事招諭百姓復業未始妄殺一人龍友字舜臣
貌甚偉美鬚髯性豪爽能文長於駢儷終廣德路同

知安字子寧幼孤事祖母孝周遊江湖遇知淮閩秦琳置幕下授忠翊郎宿州符離縣尉不赴改辟置幕以祖母老辭歸侍養道濠梁間寇掠其資官爲獲寇獄成將置之法群寇叩頭涕泣求哀安爲告讞獄者悉疏宥之羅拜而去居鄉值歉歲傾廩濟貸無靳四妹未行罄已資遣之嫁同族之孤女三人二昆欲析居安懇諭弗從乃推已分悉歸之知歙縣有誤抵極刑者白其枉而釋之改授從仕郎年近七十丐休致子十齡孫玉皆能世其家

郡誌鄭安傳

朱禮侍

鄭安歙縣人早孤事母以孝聞二兄欲分財異居不能止悉讓之寸田尺宅無所取宋亡之明年李世達叛李术魯敬駐兵昱嶺以徽反覆將屠城民亦自相焚殺安曰不可乃杖策謁軍門而言曰將軍承天子命攻城畧地欲弔其民亂者世達一人耳既而敗走民爭具牛酒以俟將軍民亦何罪而欲屠之且將軍殺人以立威孰若不殺人以得衆敬乃許之兵不血刃民皆安堵時立龍友攝郡事以安爲歙縣令就職未幾年而邑治將代民詣府請留上其事始更賜銅章真爲從仕郎尹歙旣沒鄉人思其惠請立祠祀於

其里

授鄭安尹歙縣牒

皇帝聖旨裏行中書省今擬鄭安充徽州路歙縣知

縣勾當所有劄付須議出給者

右劄付鄭安准此

至元十三年八月

日

押

押

再授鄭安尹歙縣牒

皇帝聖旨裏中書省

牒鄭安

牒奉

勅可授從仕郎歙縣尹

牒至准

勅故牒

至元十八年正月

日

牒

資德大夫中書左丞耿

押

資德大夫中書左丞郝

押

資德大夫中書右丞張

押

榮祿大夫平章政事

押

榮祿大夫平章政事

押

光祿大夫中書左丞相

押

光祿大夫中書右丞相

押

中

書

令

追封鄭安牒

皇帝聖旨裏中書省牒從仕郎泉州錄事鄭千齡父
從仕郎徽州歙縣尹鄭安牒奉

勅可追封徵仕郎職如故母洪氏追封恭人牒至准
勅故牒

至順三年八月 日

正奉大夫中書叅知政事耿

押

正奉大夫中書叅知政事帖木兒

押

歙令鄭君墓道之碑

奎章閣授經郎從仕郎揭傒斯撰

奉直大夫秘書監著作郎程大本書

奎章閣侍書學士翰林直學士中奉大夫知
制誥同修國史兼經筵官虞集篆

徽歙令鄭君諱安字子寧宋末奇士也其先自諱球
者居歙雙橋里號雙橋鄭家曾大父諱仁遠大父諱
孝全父諱文政世以貲雄鄉里然一用爲義好恤匱
凋飢貧不能昏嫁喪葬者輒相之至歙令行之益篤
令早孤事祖母陳極孝謹二兄欲分財異居弗能止
悉以讓之寸田尺宅無所受貧而無怨內兄黃嬰死
淮間徒步往歸其喪故世稱鄭氏爲德門令幼篤學
獨耻事進士業放浪淮漢間以材勇爲淮帥秦琳客

琳用其謀計輒有功奏授忠翊郎宿州符離尉不拜
又辟兩淮制置從事棄而歸宋亡之明年春二月寧
國萬戶張杲帥師入徽都統李銓以城降盡易置吏
守之五月行中書省遣總管忽都解調副將李世達
兵戍瓜洲道殺忽都解還據城守盡殺所置吏王浚
以下境內壯士皆起兵以應六月唐鄧均三州招討
使李木魯敬帥衆來攻李世達以潘興兵拒戰境上
世達與敗走敬駐兵昱嶺關三日以觀逆順否且屠
城鄭君召所知曰吾昔不仕者非薄祿仕也食人之
祿則當死人之事知時不可爲而死之是不智也今

城民危急如此我等坐視而不顧是不仁也吾其行
乎迺纓冠杖策伏軍門謁謁入長揖而言曰將軍承
天子之命攻城畧地非徒欲得其土地也欲得其民
也今爲亂者李世達一人耳李世達既敗走民爭具
金帛牛酒以俟將軍聞將軍且欲屠城固降而屠此
安所不識也曰蠢爾衆反覆僭亂不殺何待曰將軍
殺人以立威孰若不殺以得衆人聞將軍殺降誰肯
服將軍者且以帝王之師而求釋憾於一邑何以示
衆甚爲將軍不取也迺許之按兵而入兵不血刃郡
士丘龍友得郡印綬以獻遂以龍友攝郡事而以鄭

安治歛歛鄉邑又承喪亂之後一以靜理之未嘗修
睚眦之怨居三年邑大治民爭詣府請留府上其事
始更賜銅章拜真命爲從仕郎仍歛縣令尋以老自
免去遂不復仕至元二十九年七月廿又六日以疾
卒年七十二夫人洪氏賢明淑慎德爲九族師晚好
釋氏斷滋味二十年大德十年三月五日無疾而歿
年七十五合葬里之葉干子男五人昌齡斗齡先卒
千齡今從仕郎泉州錄事椿齡郡文學掾岳齡累仕
當改秩而卒昌齡實兄子立以爲後者孫男十有五
人千齡之子玉以父命至京師請銘玉力學善爲古

文矯然有高世之志人謂似其祖云揭傒斯曰吾聞
黜歛之間高者槩雲日深者鏡毛髮士生其間多磊
落而竒傑方至元之世孰不欲乘風雲依日月而令
君確乎其進退如冬夏之不可易也豈非山川之英
士林之特哉若世之聾聲音盲采色常瀕死於覆車
之轍者何啻相視於秦越嗟夫

鄭令君廟碑

翰林國史院編修官同郡程文撰

宣文閣授經郎文林郎兼經筵譯文官危素

書

奉政大夫僉漕東海右道肅政廉訪司事余

闕篆

鄭令君廟者歙人祀其故令鄭君于廟也鄭君名安歙西鄉人以一言解屠城之師令歙三年民大治其沒也思之數十年不能忘至有祀之者父老且死戒其子孫鄉人曰微鄭君吾屬無噍類矣且鄭君正直後必為神盍相與祀之廟毋祠于家於是共立香火于城西之憇棠庵尊之曰鄭令君父之以為未稱崇禮之意即庵旁立廟會郡太守不悅於民斥其請民大謹事上行中書行中書按令君功德應祭法且下

縣令聽民立廟以時致祭如請民大悅則又以庵旁廟臨大道煩囂非神所居卜遷之吉乃踰溪二里營高敞地近令君之墓更作新廟云歙人之祀令君也不敢慢恒以歲仲春中旬卜日刑牲醞酒大會廟下陳簋簋籩豆張樂歌舞拜薦以娛神禮畢醉飽神賜闔戶而退仲秋之日亦如之正月十五夜則奉衣冠出遊燈燭簫鼓香花滿野稚耆歡呼爭持紙金銀錢迎道望拜親之畏之儼如令君之復生也飲食必祭出入必告懷私負曲者不敢禱於令君之廟廟成之歲風雨協和疾厲不作盜賊屏息五穀大熟連三歲

民咸曰令君福我哉具石請于新安程文書其事刻
廟中以傳永久文惟東南之山川奇秀絕特者莫如
歙其鎮之最大而遠者爲黃山山之峯三十有六而
其最高者爲天都世傳黃帝嘗臨是山故名環城若
問政紫陽披雲金紫靈山諸峯林立如畫川流奔悍
數百里蕩爲淞江故其間風氣所蓄洩在人則賢在
神則靈而人之生徃徃歿而爲神上古遠不可知近
代大而負出世之資開繼聖之學享國家千萬年之
祀於天下小而烈夫孝女仙翁釋子之見祠于其鄉
及其徒與在外縣者不論論自漢以來有功德於茲

而血食不絕者東漢贈尚書令方豨侯廟在白羊山
村後三百餘年有陳儀同程忠壯公廟在黃墩又百
餘年有唐越國汪公廟在烏聊山最顯又四百餘年
有宋錢氏兄弟廟在汝溪又百五十餘年有鄭令君
焉是皆所謂生也有自來逝也有所爲而不爲偶然
者嗚呼盛哉漢之盛爲縣令若卓茂之於密魯恭之
於中牟朱邑之於桐鄉得祀者蓋不少而皆非其鄉
土及其季世以諸葛忠武侯之歿蜀人屢求立廟不
聽至祭於道陌之上賴習隆向克抗章上言久而得
立廟沔陽嗚呼又何其難哉我國家之崇明祀順民

心歎人之報功德厚風俗皆足以昭往古耀來今而
令君之威靈赫然流行於兩間以爲國家生民無窮
之庇休有不可掩者矣廟起於後至元某年月日遷
於至正某年月日屠城事載郡誌及翰林學士揭公
所撰墓碑茲特紀立廟始末而系以迎享送神之詞
其詞曰

靈山兮青青沙水兮泠泠中有原隰兮衍以平
樹木總總兮花冥冥庭戶敞深兮虛牖櫺几席
儼布兮崇豆登懸鐘鼓兮兩楹待令君兮不來
佇屏息兮肅以聽倏奔雲兮擁霧令君翩兮其

來下駕鶴翼衛兮使雙鳧先路馬闐闐兮珮珊
珊從之兮祖父酒注罇兮肉載俎恭獻進兮拜
偃俯繁音發兮紛屢舞佻佻兮坎坎撞鐘兮擊
鼓神欣欣兮顧喜口若言兮目若視予上下帝
所兮司福祉錫豐年兮驅厲鬼無遠四方兮矧
茲邑里飄風颯兮神以還我民報祀兮于永年
建立鄭令君廟榜

皇帝聖旨裏徽州路歙縣承奉 總管府司吏彭文
忠承行旨揮該承奉 江淞等處中書省掾史王宗
文承行劄付該來申至元十三年收附賊人李世達

還據州城李木魯敬招討領軍議將徽州城池屠戮
歙縣鄭安挺身詣軍告而不殺一人遂以鄭安知歙
縣尹視民如子三年大治自以年老不仕有功於國
有德於民如蒙准許立祠聽從民間歲時致祭實副
輿情申乞施行得此照得牧民之官在任德政理宜
去思省府合下仰照依上施行奉此至元五年十月
初二日據歙縣狀申二十三都住民汪道崇等連名
狀申切見本都鄉先生故歙縣尹鄭公諱安方國家
收附江南之初至元十三年二月寧國萬戶張杲領
軍前去收附徽州都統李銓隨即投降拜設官吏了

當五月行中書省差總管忽都解前來調遣李銓副
將李世達軍前去把守瓜洲行至績溪殺死忽都解
總管還據州城盡殺本路官王同知等六月李木魯
敬招討領軍前來收捕李世達與千戶潘興拒戰境
上敗逃走城空無人李木魯敬招討駐兵昱嶺關議
將徽州城池屠戮鄭公爲見危急旦夕必死挺身不
顧直詣軍前言爲亂者李世達既敗走百姓無罪乞
免屠戮言辭慷慨招討感動按兵而入不殺一人遂
以鄭公知縣事招諭百姓復業撫字有方視民如子
三年大治祇受

勅牒從仕郎仍歙縣尹自以年老不肯復仕委是有
功於國有德於民至元三年耆老王文宣等告蒙本
路許令建立祠堂聽從民間歲時致祭實愜輿情亦
可爲忠國愛民之勸告乞施行得此照得至元三年
四月初五日據二十三都王文宣等狀告謹按祭禮
有功於民則祀之能禦捍大菑大患則祀之又古者
鄉先生沒而祭於社故有功於民者死必尸而祀之
社而稷之示以不忘也竊見鄉先生故歙縣尹鄭公
諱安方國家平定江南之初至元十三年宋亡當年
二月寧國萬戶張公帥師入徽都統李銓以城降盡

易置吏守之五月行中書省遣忽都斛總管調李銓
副將李世達往戍瓜洲道經績溪殺忽都斛總管還
據城守盡殺所置吏王同知等六月唐鄧招討使李
木魯公帥衆來攻李世達以千戶潘興兵拒戰境上
世達敗而走招討駐兵昱嶺關以觀逆順且將屠城
令以城民危急纓冠杖策伏謁軍門力言爲亂者李
世達既敗走民爭具金帛牛酒以迎將軍殺之不祥
招討許之按兵而入民由是得免於死遂署令知歙
縣事招諭百姓復業歙邑又承喪亂之後一以靜理
之居三年邑大治民爭詣府請留府上其事祇受勅

一海美錄卷一
牒從仕郎歙縣尹以老不復仕優游里閭邑人尊稱之曰鄭令君去今六十餘年流風未遠父老猶能歷歷稱衛其事所謂有功於民能禦大菑捍大患者也况其爲吾郡之鄉先生乎今來文宣等心思兵亂之餘玉石不分之際若非令君一言一郡生靈肝膽塗地矣然則使一郡之人得保首領長子生孫以至今日而享太平之福者令君之力也祠事不設何以示報令君世居本都文宣等耳聞目見不容緘默本都憇崇庵一所俯臨大道實爲士庶往來之衝如蒙准告許於庵內建立祠堂雕塑遺像以令君廟爲額聽

從民間歲時祭祀實副輿情告乞施行得此縣司者詳方至元間李世達兵亂之時玉石不分之際鄭令君以頰舌折衝干戈之間遂使一郡之民免於鋒鏑之禍此官民之所共知昔之所傳頌政所謂有功於民者如准父老等所請建祠致祭允愜公論庶懽輿情爲此申奉總管府指揮該相度鄭令君當大兵屠城之際片言折衝止戈戢暴一郡生靈俱獲安全然捍大患有功於民蔑以加此稽之祭法擬合立祠歲時致祭報功崇德以愜人心實爲允當仰依上立祠祠成委官致祭施行奉此行據二十三都里正黃

祭卿申祠堂已行落成得此移牒主簿韓進蒙依上
致祭施行得此先據歙縣亦爲前事已下本縣依上
立祠祠成委官致祭施行去訖今據先申鄭令君當
李世達叛亂之餘大軍屠城之際奮不顧身爲民請
命言辭慷慨義動三軍德澤汪洋全活一郡及爲縣
令號爲賢宰遺風善政至今未泯邑人立祠致祭以
示不忘自古賢宰沒而爲民所祀往往有之允從所
請豈惟激勸忠賢誠足以淳風俗申覆省府看詳照
驗去後今奉前因總府今將榜文一道隨此發去而
照驗收管張掛出榜依上施行奉此出榜曉諭依上

施行所有榜文須至出給者

右榜諭

衆通知

至元六年正月十五日

總府

押押

徽州路祭文

惟山川淑氣篤生偉人能爲民禦菑捍患是宜享有
明祀方至元之初郡將叛遁王師壓境誓將屠城非
公奮仁義之勇掉三寸之舌使三軍之衆易暴爲仁
一郡生靈何以有今日功德懋矣某等來守是邦訪
求遺事敬仰英風會有司以立祠事上祭法惟允公

其安靈于茲尚與山川之神相時雨暘作爲豐年使
郡無水火盜賊癘疫之虞以陰祐我郡邑承平之治
神亦享世世無疆之休厥惟嘉哉尚享

徽州路萬戶府祭文

猗于令君生仕于鄉歿食其土功德既茂祀報寔宜
佳兵不祥以殺爲事轅門一語三軍偃戈公誠以言
將仁而聽兵不血刃斯爲王師烈烈英風凜凜義槩
忠真之至貫于幽明山高水深日月遠矣父老懷感
如臨目前余襲弓旌保此城邑追慕往哲亦惟令君
兵以仁強不以殺暴公神如在余言不誣額額新祠

儀像孔肖刺牲醴酒以告微衷神其鑒之尚饗

時祭祝文

維宣德七年歲次壬子二月乙巳朔越十有五日巳
未裔孫行簡等敢昭告于十世祖從仕郎歙縣令十
九府君之神惟神鍾山川英爲士林特宋亡明年保
全城邑褒功登庸錫歛尹秩澤被斯民政聲洋溢歿
世不忘慕功戴德請祠祀里永享血食行簡等叨居
末裔沾澤深茲循歲規祀於仲春謹以潔牲剛鬣
淞盛醴齊敬修祀事式陳明薦以十一世祖承事郎
休寧縣尹貞白先生萬八府君十二世祖翰林待制

奉議大夫師山先生仲十四府君配食尚饗

濟美錄卷之二

此處有非常模糊的印文或殘存文字，難以辨認。

濟美錄卷之二

郡誌鄭千齡傳

朱禮侍

鄭千齡字耆卿歙縣人授延陵巡檢轉祁門縣尉淳安縣尉休寧縣尹以疾卒千齡操守廉介學者私謚曰貞白先生鄉人因以名其里

郡誌宦業傳

汪靜軒

鄭千齡字耆卿歙雙橋人授延陵巡檢轉祁門尉改淳安縣遷休寧縣尹操守廉介所至有惠政祁門民尤德之學者私謚曰貞白先生有司復為作里門易其所居善福里為貞白里子玉

濟美錄卷之二

相補

祁門縣宦蹟類

鄭千齡字耆卿歙縣人泰定間爲祁門縣尉剛介廉明歷任五載凡有不給日用則取之於家鄰郡有以僞緝移文勾擾鄉民爲取賂計灼知其弊竟匿其文而不署其害遂弭凡有僞鈔盜賊事覺不容妄指平民邑西某村有強句聚黨嘗劫人財物頻年爲患躬捕其首繩之以律散其黨而爲農行旅無懼修葺公廨創置兩廡門屋一瓦一材必經於心此爲政之良者也

文獻志貞白先生鄭公行狀

程黥南

公諱千齡字耆卿姓鄭氏徽之歙縣人故歙令鄭君安之子也其先有諱球者始居歙之雙橋里以貲雄有里號雙橋鄭家自曾大父孝全大父文政尚德樂義好施予至鄭君行之益篤嘗徒步千里歸內兄黃嬰喪盡推其家財與二兄寸田尺宅無入己者淮帥秦琳聞其賢辟符離尉不起至元中唐鄧鈞三州招討使李术魯敬帥師臨徽討叛將李世達世達敗走進兵昱嶺關城且屠鄭君奮起杖策詣軍門揖白招討亂由世達非百姓罪招討固竒鄭君聽之不屠城因署鄭君令歙三年有功德于民民祠之號鄭令君

公幼卓越七歲聞人講呂東萊春秋退即能衍其說
從令君行沙上仰視飛鳶即問曰是何所憑依邪稍
長師上鄉先生魯齋鮑公一以躬行爲學及壯從令
君入京師出入諸公貴人一時翕然稱許禮部尚書
謝公敬德吏部尚書劉公伯宣侍郎夾谷公之竒交
薦之於朝署公秩八品宋降臣留夢炎新用事吏部
以白身南人例黜公待調行省丁外艱大德元年始
板授寧國路太平縣弦歌鄉巡檢時徐道者以妖術
惑衆弦歌之民皆徙市登山妄言禍福公擒其魁得
誣罔狀衆盡駭散設布方畧察姦防盜民安其業始

買地爲官舍旁爲屋榜曰弦歌書院日無事討論典
籍後進視以爲師六年遷鎮江路丹陽縣延陵鎮巡
檢首謁吳季子廟召父老謂曰昔季子薄千里之吳
而不王百世之下遺風猶在其民矧肯爲盜乎公等
幸爲我戶致此意勿陷刑辟即月旦十五日率吏卒
謁拜祠下遠近化服水決練湖郡檄公督治公負畚
挿以身先士卒連晝夜風雨不倦水以不害丁內艱
至大二年調處州縉雲縣美化鄉巡檢劇賊金卒二
嘯聚無賴往來温台處婺間白晝鈔畧吏莫敢誰何
公潛遣聚石道旁山上匿壯士草莽中伺賊過飛石

擊之賊驚走草中壯士大譟從之賊窮蹙圍之盡俘其黨皇慶二年調建康路江寧鎮巡檢流民數千過丹陽市持弓矢刀槊殘害居民民不堪起而敵之衆數萬人擊鼓圍之使不得去公聞疾馳至解其圍單馳入流民隊中呼其長數之曰汝等皆天民不幸流移本欲逃生乃更速死殘害吾民何也叱其爲亂者數人縛之拘其械噐驅其徒衆送之渡江適野見婦人哭而哀公使問其故婦人抱嬰兒前拜曰妾孀也家貧唯一子尔有田若干與勢家連勢家僞契奪有之母子無以爲食是以哀也公曰盍言官乎曰勢家

不可言也有死而已他日公召勢家語之且開以禍福勢家感悟謝過遂歸孀婦之田有負篋暮投主人宿者主人方蚕設榻堂下戒之曰東壁敗缺宜謹視篋中藏東隣之老見焉是夕亡其篋意東隣之老吏執而訊之其子自外來面毀衣裂若穿穴隙之爲者吏喜得盜獄成公曰其跡是其情非也緩之無何他郡獲盜乃嘗盜篋者也衆乃歎服去之日百姓遮道不得行公舉手謝之咸拜泣而去延祐六年始命于朝爲建德路淳安縣尉淳安界萬山中多長林深谷盜賊之所出沒守禦者竝緣爲姦利公至盜賊稍稍

引去而千戶汪元珪貪酷病民公曰盜在是矣即條
上其罪府若省元珪坐罷境內晏然尉署傾圮公撤
而新之取孔子答季康子語扁其泣事之堂曰不欲
署之東舊有梅隱軒西有拄笏軒皆廢公皆起之立
朱子之祠表錢公之墓修淳安誌書舉邑士吳君暉
洪君震老夏君溥充試有司後皆知名泰定元年調
徽州路祁門縣尉祁門亦鄉邑難治公集長老好諭
之曰爲我約束鄉閭勤固門戶謹守望慎毋犯法人
亦素服公威望人人自重縣曹失文書一櫃無所蹤
跡檄公詰盜公曰是非盜也必愚民有獄不解計出

無聊故爲是以滅跡爾即問吏有獄事在官最重者
誰乎吏曰某鄉某公即馳至其家搜無有也唯一棺
焉發之文書果具在縣民馮華甫以孫壻爲後俗謂
之補代馮沒二十年矣其族人訟之十年矣官不能
決公攝縣事舉春秋莒郟之義立馮氏子有僧言其
徒育於已十八年其叔欲奪而歸之以爲後者公曰
民無後後其兄弟之子禮也法間民爲僧故有覆實
之文謂非爲人後者今叔無子後其兄之子所以廣
占籍明人倫僧柰何欲絕之命叔償其衣食之資歸
其姪以爲後或訴康氏死不爲立後而有其資者

公召問狀且云有母公曰天下之愛其子者莫母若也子死無後忍之乎召母問故母謂子死時七歲公曰殤子不當立後其訟遂息大修縣學建明倫堂門廡齋舍皆高壯宏麗尉署爲風雨所壞公發已帑新之其屬爭先趨事公曰必完必固無憂後人祁門與石埭青陽浮梁太平諸縣接界奸民數以僞鈔事誣連吾邑公燭其奸折以文移至十往返卒不逮一民一日旦起從數卒東馳不十里奄入山中民家衆莫測所爲至則縛其人搜其家得僞鈔及器具以還旬有五日復入山羈其孥秋毫無擾所過民相率拜道

上及代歸老稚扶携送郭門外者十餘里不絕至順元年陞從仕郎泉州錄事是時廷臣有言泉南竝海多諸番寶貨宜擇廉能吏爲守令者故起公馳驛就職公歎曰吾老矣母以貪介取辱即手署致仕章上之明年夏四月感疾卧杭州傳舍三日子玉侍側從容語曰吾思平生心身無可愧者可以見先人九原矣瞑然而逝身無遺衣物布被破靴而已其友宜興王仁源爲貸於所親得錢具棺衾以斂玉持喪歸舟過淳安人皆哭迎送曰我公不復得見矣五月壬午玉奉柩歸于家之正寢且卜葬嚴陵吳縣尹墩涿郡

張副使士弘太原王教授瑄與其徒合辭言曰明公德行明潔正直不囬請私謚曰貞白先生明年里中父老白于有司請改善福里爲貞白建里門立石刻辭以表著公德又明年朝廷以公前致仕章贈承事郎徽州路休寧縣尹妻汪氏贈宜人命始下公矍然長身顏目清古性恬澹無所嗜好衣布衣如錦綉啗糲食如梁肉鄉鄰有貧病患難救之如不及與人語休休孝義忠愛不飲酒對賓客有餘歡入郡縣不騎馬蒼顏白髮行市井間唯一童自隨初欲與兄弟義居嫁娶喪祭各有儀式及志不得施則悵然取田之

磽瘠器之弊陋者退處於偏而讓其正居於昆弟居鄉如處女當官臨事則剛毅奮發而有爲不阿長官不承風旨僚吏莫不敬憚之部使者行縣皆曰鄭尉長者必加禮貌公前後爲捕盜官四十年未嘗任親民一攝祁門令旬日間人稱其神明之政所至禮儒先興學校舉廢墜功績反出縣令丞上既去有去思惠愛之碑職專勢微德不及大施材不獲盡展也公生於宋景定六年十月甲午歿於皇元至順二年四月癸亥享年六十有七娶同里汪氏即宜人先公十四年卒子男二人長曰玉次日璉女一曰柔貞嫁同

郡吳虎孫玉柔貞宜人出也孫男一人女一人以元
統二年甲戌歲十一月壬寅葬於里東方村之原宜
人汪氏同墓文郡諸生也始拜公于京師之旅邸即
辱知愛數與公之子玉游及爲黃竹寨吏當祁門道
上聞祁門人言益信公平生德政又得公之客胡默
先生所記遺事頗詳謹序次如右玉將求諸立言君
子乞銘以圖不朽焉婺源程文狀

改善福里爲貞白里帖

皇帝聖旨裏徽州路歙縣承奉 總管府司吏許敬
承行旨揮該據儒學狀申准本學教授 關該竊
見本郡鄉先生故從仕郎泉州錄事西疇鄭公少以
篤學著聞及長卓然樹立凜不可犯故當官行事有
特達之見發擿奸伏有超逸之才歷任無一毫之私
處已無四知之愧且其粗糲雖酸齏麥飯以爲常自
守貧窮雖敗絮布衿安其分行止隨其所遇得失皆
委之天身歿之日家無餘財卑職乃會諸生及先生
所往還與其徒聚曰謚以易名其來尚矣古之賢者

必有謚其或困於貧賤厄於下僚法不得請于太常
則其徒自相與謚以旌其德以飭其風庶使爲善者
知勸願學者有師其友南陽府鎮平縣尹吳從事江
南瀾西道肅政廉訪副使張奉直與卑職議得謚法
清白守節曰貞內外復貞曰白謚曰貞白先生率衆
領諸儒及寄居學官人等祭享焚白了當今來照得
貞白先生所居歙縣二十三都衮繡鄉善福里如將
善福里易名貞白里庶使前輩尊崇後生激勸亦明
時風化之一助關請施行准此申乞照詳施行得此
照得各官所議誠爲相應仰照驗依上謚改施行奉

此照得先准儒學關亦爲此事行據本都吳鵬舉弁
處等狀申隨即會集本縣都鄉老汪友石鄭文旺王
文先社長鄭昌壽從實照上思得故泉州錄事貞白
先生鄭公存心誠實處事公平居官著水蘂之聲在
鄉得山斗之譽以廉致貧衆所推服如將善福里易
名貞白里使後之學者懷慕道德想望風采聞而興
起其於教化實有所補誠爲便益申乞施行間今奉
前因除外今將榜文一道隨此發去仰照驗收管張
掛依上謚施行須至帖者

至順三年四月 日

貞白里門碑

翰林待制揭傒斯撰

國子祭酒歐陽玄書

監察御史趙期頤篆

至順三年春二月之望歙郡文武官屬勸農于郊郡
西袞繡鄉善福里諸耆耄咸盛衣冠扶杖輯屨來言
曰僕不佞竊慕君侯之義久矣夫政有關於教化繫
風俗足爲民望者亦君侯事也僕之里有鄭先生千
齡者其父安在國初時嘗爲邑宰我等獲保首領長
子孫養生送死於此土者皆其力也今先生又能推

先世之德擴君子之教使我服禮義涵教化垂髻戴
白不失爲良民皆其力也先生嘗爲淳安祁門尉其
政亦如其父宰邑時不幸以從仕郎泉州錄事卒泐
江肅政廉訪副使涿郡張君士弘南陽鎮平縣尹嚴
陵吳君暉郡教授太原王君瑄等言先生於家爲孝
子於國爲良臣於鄉爲賢父兄是宜有謚於私既相
與謚曰貞白先生若夫宅里之表著於三代惟君侯
圖之皆曰然乃擇日作里門易善福里爲貞白里表
諸四達之衢里四隣諸耆耄又盛衣冠扶杖輯履詣
府而言曰僕不佞竊聞君侯特表鄭先生里里我等涵

濡先生父子之化深矣而不獲竊餘光以庇子孫歿
且不瞑願以地附先生里惟君侯圖之又皆曰公等
景行懷德不移死生風教之幸也敢不敬從於是東
西行者出入是門莫不仰先生之風慕長吏之義油
然興起不能自已乃謀刻石以告來者其辭曰
惟古致治褒德顯庸厥有典常謚以易名表以著行
式昭四方茫茫歛郊乃有鄭公德音孔良民懷其惠
士服其教既歿不忘或議其謚或表其里靡不用道
愚夫愚婦抃手頓足懿德是好莫濬匪黜莫高匪黃
是爲輿區在昔有言惟歛西里神秀所都民習禮讓

女秉貞潔士耻佞諛聯公累卿政事文學竹帛所書
於鑠鄭公孕冲毓和與世作模巍巍高門貞白是旌
過者式趨

又

程黉南

徽故歙郡郡之西鄉曰衮繡里曰善福地夷曠綿亘
數十里山迴水舒風氣蓄密甲於一郡鄉先生鄭公
世居之先生卒至順中士大夫私謚曰貞白有令德
善教鄉人思之不忘白于有司請以善福里爲貞白
里以昭徃哲垂來世里之四隣咸請附焉有司從之
乃立木爲門表諸道途大書其上曰貞白里維時郡

邑之賢學校之英官府之良山谷之氓咸歡欣鼓舞
環觀聚嘆交口稱善請伐石載辭以紀成績謹按先
生諱千齡字耆卿故歙令尹諱安之子以文學起家
歷淳安祁門尉轉官從仕郎泉州錄事進承仕郎休
寧縣尹致仕以躬行之學仁厚之政居一鄉化行一
鄉仕一邑化行一邑爵祿不足以累其心故位不加
顯而安聲色貨利不足以奪其操故家愈貧而樂卒
之日身無餘衣物然生也人慕之卒也人思之古所
謂鄉先生歿而可祭於社者非先生之謂歟里之有
門三代之制也門左右塾父師少師朝夕坐焉以教

其里中子弟之出入者故人人有士君子之行而今
不講矣里門之設猶有存者漢萬石君家子弟入里
門必下車趨至家鄭司農爲當時儒宗孔融曰鄭君
里門四方所由觀禮名其門曰通德之門蓋一門之
設置雖微而其有關於世教爲甚大况徽爲朱文公
父母之邦其山川之勝風俗之厚世家之舊民之懿
德官之善政皆不可以不書使來者有所觀感而興
起亦三代之遺意也繫以里人之歌其辭曰

桓桓歙邦貞白之里其里伊何維先生所止貞白之
里有里有門其門伊何維先生是尊猗歎先生若昔

子產遺愛在人不泯益遠出事長上人事父兄詩書
滿家惠我後生貞則不磨白則不滓豈惟名稱惟德
之似母曰官小亦政與仁雖有桐鄉不如里人里名
易矣里門闢矣先生之德庶無斁矣里門峩峩有山
有河居民孔多來遊來歌里門雅雅照耀原野於千
百年過者下馬

徽州府學檢舉鄉賢追崇祀典申文

應東白

元貞白先生鄭公千齡學有的傳政多奇蹟
先朝有表里之帖流輩多闡幽之文仕不盡才見稱

於程禮部書不盡美追惜於揭翰林全活一郡承厥
考令君有光羽翼六經啓厥子師山爲烈郡誌足徵
公論可覈實

先朝之逸民後代之遺矩也

濟美錄卷之三

元史忠義傳

翰林學士亞中大夫知制誥兼修國史臣宋濂

翰林待制承直郎同知制誥兼國史院編修

官臣王禕等奉

勅修

鄭玉字子美徽州歙縣人幼敏悟嗜學既長覃思六
經尤邃春秋絕意仕進而勤於教授門人受業者衆
所居至不能容學者相與即其地構師山書院以處
焉玉文章不事雕刻煅煉流傳京師揭傒斯歐陽玄

咸加稱賞至正十四年朝廷除玉翰林待制奉議大夫遣使者賜以御酒名幣浮海徵之玉辭疾不起而為表以進曰酒與幣天下所以奉陛下陛下得以私與人臣不敢辭也名與器祖宗所以遺陛下使與天下之賢者共之陛下不得私以與人待制之職臣非其材不敢受也玉既不仕則家居日以著書為事所著有周易纂註十七年

大明兵入徽州守將將要致之玉曰吾豈事二姓者耶因被拘囚久之親戚朋友携具餉之則從容為之盡歡且告以必死狀其妻聞之使語之曰君苟死吾

其相從地下矣玉使語之曰若果從吾死吾其無憾矣明日具衣冠北面再拜自縊而死

師山先生鄭公行狀

先生諱玉字子美世居徽州之歙縣衮繡鄉貞白里十二世祖諱球以貲雄其鄉號雙橋鄭氏曾大父文政大父安至元初聞大兵討李世達將屠城即杖策詣軍門言動主帥全活郡民遂授徵事郎歙縣尹沒而民思其德言於有司請立祠省府嘉歙民之志下其事如請俾列之典祀號鄭令君廟父千齡累官承事郎休寧縣尹以操行著稱學者集士友私謚曰貞

白先生有司表所居爲貞白里大德二年戊戌貞白
公調官太平縣之弦歌鎮七月一日母夫人汪氏生
先生於弦歌火光照室隣里驚駭貞白公心異之嘗
指語汪夫人曰吾爲吏治獄不任苛刻人蒙吾力脫
罪罟者不尠天或報施是兒其大吾門乎先生自髫
鬣不與凡子伍稍長穎敏不治細務唯嗜讀書禁無
以家政關我才十歲聞人誦朱子之言則喜其契於
吾心也聞人論朱子之道則喜其切於吾身也於是
日誦四書玩味朱子之說而紬繹之沉潛反覆久而
融會貫通得其旨趣數從鄉先生學意不適輒易師

既而載書入黃山祥符寺又遷紫陽南山觀處已以
澹薄自持立心以誠敬爲本攻苦殖學靡替寒暑嘗
因同郡進士王君儀過之欲烹鷄供具僮隸逐鷄飛
鳴躑躅遂不忍烹王君拊其背曰子美長養此心因
是於惻隱之發體認涵養造詣益深矣再應進士舉
不利即棄舉子業求聖人之道於六經研精覃思優
游涵泳蘄必至古人之域至順初侍貞白公游京師
閣老諸公覽其所爲古文將交章薦之先生竟奉親
南歸不屑也貞白公卒于杭先生扶櫬數百里歸殯
於家哀毀踰禮及葬門人士友相執紼者數百人見

先生祖載遣奠躡踊相侑一循古典大敬悅之除喪
或勸先生筮仕咲而不答築室里之師山將著述以
見意學者從先生問學紳佩寢盛門人鮑元康等因
其地剏師山書院殿堂門廡庖湑咸具講肄有齋登
眺有亭先生日與諸生論說春秋而通其大用間被
短菴游釣岑山之陽鄉之人目岑山曰鄭公釣磯元
統初有司以先生德行文學純備才識達於治體滋
欲試之以政上薦章于浙省若江南行御史臺先生
謝絕不就至正十二年春先生聞蘄黃紅巾兵陷江
州郡守李公黼死之西鄉慟哭三月聞饒州繼陷語

門人曰主上未有失德茲不過烏合之衆然承平日
久將驕卒惰莫克禦之耳四月蘄兵繇婺源破徽城
據之先生避地南石耳山五月蘄黃主帥搜求先生
先生欲死之門人鮑元康語從子深曰家可再有今
先生世不可得深與先生弟璉冒刃入城內賄以免
九月大軍克復時州里豪俠多禽脅從者以獻為名
爵計先生嘆曰殺人以干祿仁者不為也是冬蘄黃
兵再陷郡先生竄靈山中其徒百計訪先生將至
先生所先生亟避之攀磴墮地折臂氣絕復甦明年
濶省平章三旦八公率大軍來討郡邑悉平平章素

知先生名德欲舉而用之先生以手病辭十四年遠
近寧謚門人以師山精舍巋然歎存迎先生講學其
中刪定所註春秋或往來岑山手不釋卷六月天子
以大臣薦遣使者謝嘉卿齎內府酒帛以翰林待制
奉議大夫召先生于家使者浮海而達九月至郡監
郡按敦海牙公率僚屬至山中先生卧病不起監郡
強起之乃拜受酒帛固辭宣命請以布衣入覲是冬
偕使者至泐省而番陽餘孽復陷郡城丞相塔失鐵
木兒公見先生驩甚劇論時事便宜至莫弗勸明日
將燕先生先生語丞相曰敝邑為江泐屏翰生民殖

醢丞相不亟拯救而寵然燕禮歎何心歟言既泣數
行下丞相為之改容即調建德路元帥劉公某會合
徽泰翼官軍征討先生復請給饗饋十六年三月進
兵克之輓漕無乏監運婺源判官曹子學謂軍士曰
此鄭待制之淚所致也若屬知之不乎四月先生行
至海上疾作草謝表授使者而歸六月舟過建德之
淳安邑之梓桐源士族徐氏王氏迎先生登覽河山
之勝徐氏將建書堂留先生講道其中是秋門人鮑
深自泐來會遂與俱歸隱于郡南孤山之麓時泐東
元帥八爾思不花公監郡泐都沓兒公太守鄭公傳

翼歛縣尹潘君從善旬朔省起居咨問安民禦寇方
畧孤山之傍富登渡鉅石屹立溪澗先生疇昔釣游
其所淮南省平章余公闕大書鄭公釣臺先生自爲
文記之里人吳虎臣刻諸石十七年還師山纂註周
易是時先生竹冠野服一僮抱琴一僮持綸相羊山
水間忽憶黃山舊遊偕諸生尋訪故館浴于丹砂泉
磨崖紀歲月而還秋七月

天兵遽至郡城失守先生率昆弟子姪復往梓桐源
仍館徐氏十八年淳安建德相繼亦破先生間道歸
隱休寧山中七月朔旦初度晨起熏沐東向再拜不

自勝語弟璉曰夜來達旦不寐何也明日聞郡中大
小人言於主帥欲羅致之先生曰吾知死期至矣二
雉飛入吾室此其兆也弟璉懼傷先生奮身往主帥
拘之不得還令以書招先生亟出先生曰吾荷國厚
恩偷生苟容何面目立於天地間耶欲亟死而吏卒
猝至急如星火逼迫至郡主帥引見命左右拽之跪
拜先生不爲禮問爾何不出先生曰昔元朝授以隆
賜命之顯秩尚辭不出今何出耶又問爾隱山中曷
不爲用先生曰我前日不仕今復仕耶抗辭愈厲主
帥命左右拽之出羈留郡城先生閉戶高卧不食七

日猶賦詩爲文從容若平時手爲書喻諸生曰人言
食人之食則死其事未食其食奚死然揆之吾心未
獲所安先哲論殷三仁胥獲本心士臨事惡可不盡
其本心哉吾初欲忼慨殺身以敦風化既不獲遂志
今將從容就死以全節義耳復爲書戒弟璉屈志以
存宗祀戒子逢辰與從子拱辰義居以續孝友之風
夫人聞之使語之曰君苟死吾其相從地下矣八月
一日沐浴更衣北鄉再拜入寓館自經而死聞者見
者賢與不肖咸喏喏嘆息曰男子哉男子哉弟璉奉
柩歸殯于家明年己亥十有二月庚午葬休寧縣廟

嶺上尊治命也先生娶程氏有賢行克相厥德子男
二人長祖澤早卒次逢辰女二人黃庭堅吳宗其婿
也惟先生質類清古襟度坦夷卓行特立應機能斷
天性孝友自貞白公既歿終身一聞其諱或其遺事
輒泣下霑襟每過貞白里門泫然流涕莫能仰視母
夫人汪氏病癱若石榴然以沒終身不食榴實弟璉
蚤失怙恃先生盡意訓育底于成人從兄國英實祖
母洪氏之兄子子也眎如同氣既卒撫其遺孤尤極
勤篤每過先塋必下車伏謁自十世祖而下悉立石
大書深刻以表其墓復爲族譜圖列始祖以下十五

世群從子姪名字刻諸徵事公墓碑之陰敦孝友也
爲人質直耿介重然諾於人少許可一介不妄取與
故遠近學士大夫以孝廉目之每與名公大夫論及
爲政必以樹綱常厚風俗爲急先務其爲學大槩本
朱子嘗謂學者曰斯道之懿不在言語文字之間而
具於性分之内不在高虛廣遠之際而行乎日用常
行之中以此窮理以此淑身以此治民以此覺後廢
乎無愧於古之人矣晚年以師道自任誘掖後進無
厭怠意門人有過面折之不少貸有善則獎借而汲
引之成材者居多其於經則曰易於諸經爲首出而

獨爲完書天地萬物之理古今萬事之變易無不具
而吾身心四體出處進退易無不在是故不可一日
而不講者於是取文王周公之辭以爲經列夫子十
翼之辭以爲傳其或十翼辭義簡奧則附以註說命
曰周易大傳附註既又折衷程朱二夫子之說合爲
一書命曰程朱易契謂春秋損益四代之制爲百王
不刊之典所以著聖人之大用體天地之道而無遺
具帝王之法而有徵其功足以過人欲於橫流存天
理於既滅明之者帝王之治可復有易詩書而無春
秋殆皆空言而已惜夫傳之者不知經之大用言人

人殊紛如聚訟程傳得經本旨恨無全書朱子間有
論著未及作傳於是稽諸經以證傳之謬因朱子通
鑑綱目凡例以經為綱以傳為目凡諸說之合於理
者則取之其或經有脫誤無從質證則寧闕之以俟
知者命曰春秋傳闕疑於禮經則屢欲與友人汪某
參互考訂因朱子師友儀禮通解釐析經傳因衛氏
集義刪定註說以成一家之言值干戈騷屑而志弗
克遂其為文以正大剛直之氣發為雄渾警拔之辭
感慨頓挫驚濤駭浪粹然紀事樸實不為雕鏤鍛鍊跌
宕恠神之作入馬遷班固而根之以六經之至理

大抵主於明正道扶世教語子以孝語臣以忠初入
京師或傳數篇于奎章閣下侍書學士虞公集授經
郎揭公侯斯藝文監歐陽公玄驚以相眎曰是蓋
工於古文嚴而有法晚與平章余公闕吏部侍郎危
公素南臺監察御史程君文最相知而公之文名大
振於朝野間矣先生雅好登臨酷嗜山川泉石佳
搜竒選勝極峻窮幽南游淞左右北上燕薊跨
之墟瞻岱宗鳥嶧碣石居庸之秀如石門金華西山
南山佳處嘗一馬在焉登天目山宿獅子寺盤桓五
立亭上睹雲海之奇觀郡南覆船山邃深險異為

郡之甲先生甚愛之每夏携書避暑山中門人洪斌
為構招隱草堂于眠雲石下嘗偕程君文湖南金憲
鄭君潛前進士明君南華同游賦詩以詠歌之尤且
察山水之情性一然識其理雖未讀郭氏葬書而議
論玄妙與臨川吳先生所著如合符契嘗喜休寧南
嶺溪山環拱扶輿清淑之氣凝粹於是屬弟璉曰吾
沒則葬於是焉西講道師山學者尊之曰師山先生
縉紳稱謂率以守行所著詩文若干卷自題曰餘力
藁藏于家嘗論先生平生使槩大抵學有本原而忠
義大節處之有素觀其撰漢高帝素羹論章孝女雙

廟碑及獻書乞立故宋文丞相祠以旌節義則先生
涵養志趣已瞭然於胸中矣故能辭翰林之聘而不
受拘囚之辱勁氣耿耿充塞兩間易於困之象曰君
子以致命遂志身可危而志不可奪也繫先生之謂
矣克寬蚤歲與先生相知惟深比年往來師山劇談
要道不翅異姓兄弟世故搶攘遽成契闊謹以所聞
於先生門人弟子者摭其大槩如此庶備
朝廷大史氏之採擇云戊戌歲八月望日祁門汪克
寬謹狀

宣命

皇帝聖旨裏中書省至正十五年六月二十五日燕
古兒怯薛第二日水晶殿裏酉時分速古赤兒道童
三都不花等有來省官噶量了蠻子右丞相實理門
叅政伯顏帖木兒叅議野先普花都事直省舍人善
財奴等徽州路鄭玉有名的秀才晦跡隱居有為不
仕今將他委付做翰林國史院待制教徵聘將來呵
怎生麼道皇太子根底上位根底奏聖旨識也者麼
道奏呵奉聖旨那般者欽此除依外今差本役賚宣
命一道御酒二壺段子二表裏馳驛前來

壙誌

先兄翰林仲十四師山鄭先生壙誌

先生諱玉字子美行第仲十四歙縣衮綉鄉貞白里
人曾祖諱文政祖諱安官徵仕郎歙縣尹考諱千齡
官承事郎休寧縣尹先生生於太平縣弦歌鎮生而
火光滿室考君心竊奇之八歲就學記誦如流長不
治細務讀書黃山後遷城陽南阜兩赴鄉貢不利乃
習古文究聖賢心法以養親為樂一介不妄取與人
以孝廉目之嘗游

京師奎章閣授經郎揭公奚斯藝文少監歐陽公玄

觀其古文嘆賞不已侍書學士虞公集揚于座曰鄭子之文異日必負大名於天下因交章薦之先生翩然南歸耕於師山註書立言從游者衆諸生為構師山書院久之

天子知名出內府酒帛遣使就隱所拜翰林待制不受以布衣從使者入

覲至海上疾還復隱師山有司請設官於

朝命下而郡城失守先生避於淳安梓桐源明年徙休寧山中秋七月有中以飛語者先生慨然曰吾即死報

國足矣言未已捕者奄至談笑就捕至庭抗論不屈主者怒遂胥縻之閉門自餓七日不死乃起賦詩為文越二日沐浴正冠望北再拜自經以死時戊戌八月初一日也嗚呼先生學問見諸所註春秋闕疑才識見之文章惜其才未盡試卒罹禍亂可勝痛哉先生遺言謂殺身成仁盡其本心其忠肝義膽俯仰無愧如此實祖宗之光璉也不才抱憾無極先生生大德戊戌七月初一日享年六十有一晚嗜登臨精地理學得地於休寧廟嶺之上謹以己亥十二月庚子奉先生神柩歸葬遵治命也先生娶休寧率口程斌

六府君之女克相厥德子男逢辰女二人弟璉嗇哀
忍痛謹叙先生行誼大槩納諸壙中恐異時五患之
不能避也知其為忠義師也先生之墓幸相與掩之
元至正十九年己亥十二月癸前五日丙寅弟璉泣
血再拜謹誌

承事郎池州路同知會昌州事鮑同仁填諱

生日祭文

維嘉靖十年歲次辛卯七月壬子朔旦裔孫孟崐等
敢昭告于

十二世祖師山先生文貞公惟公海嶽儲秀純粹
高明涵泳聖經討論理學躬行實踐上法程朱受業
從游生徒雲集值前元俶擾之季力辭聘徵當
王師下城之初義不屈辱名昭史冊道尊儒林百世
之下鄉邦後學莫不聞風起敬而况近宗末裔者乎
孟秋之吉適屆生辰爰具牲醪敬修明薦英靈如在
降監有嚴佑啟後人文風日振尚饗

重建師山書院祭文

裔孫淑

惟公道傳洙泗學繼紫陽一時高第雲集百年書院
重光沉潛乎仁有一介不取之節從容乎義有百鍊
不磨之光先世之墳墓賴公立石而不泯本宗之支
派藉公筆削而表彰公之英靈更歷世而猶在公之
名節愈久遠而彌芳推其生也不受二姓之爵祿今
其死也肯享異姓之蒸嘗功存後世德澤難忘此所
謂沒而鄉人當祭之於社况吾宗而可不奉祀之悠
長也耶尚饗

重建師山書院祭文

濟美錄卷之四

郡誌紀

鄭璉字希貢雙橋人師山玉親弟父椿爲郡學正至
正十二年紅巾斬賊竊據徽城璉年三十七與兄璿
傾貲召募義兵協助大軍克復城池用心守禦十三
年隨福建道都元帥帖古迭兒克復婺源州以功擢
太白渡巡檢十六年正月賊復據徽州璉又與兄璿
募義兵三百五十名同官軍克復進攻黟縣漁亭藹
岡賊寨又進復祁門縣治守禦黟縣屢次殺賊三十
餘人生擒僞百戶牛子俊僞千戶巴子成數人元帥

李誠以其功咨呈樞密院陞充行軍都鎮撫璿字國英性孝友居鄉每仗義濟人人多德之

授鄭璉婺源縣太白渡巡檢劄付

皇帝聖旨裏福建道宣慰使司同知副都元帥據徽州路歙縣住民鄭璉隨軍克復婺源四月十八日周坑臨陣擒獲賊人洪德五謝壽一謝壽七朱奇翁汪禮五名除名正典刑驗定功賞例合一官保充婺源縣太白渡巡檢具呈

江浙等處行中書省統兵官平章政事榮祿照詳施行外所有執照須議出給者

右劄付巡檢鄭璉准此

至正十三年 月 日

行樞密院保鄭希貢尹歙咨呈淞江行中書狀皇帝聖旨裏江浙等處行樞密院所委總制官浙東道宣慰使司同知副都元帥八爾思溥化准本道奮揚於威武理官輔治在慎擇乎忠良切見鄭璉年三十七歲本貫徽州路歙縣儒籍係已故本縣尹鄭徵仕郎之孫休寧縣尹鄭承仕郎之子即今朝廷徵聘翰林待制奉議大夫鄭子美親弟斯人才

一 濟美金卷四
謀出類文武兼能衛兵懷應變之機臨事有高明
之識慈祥愷悌智勇端方昨因至正十二年紅巾
賊人竊據徽城本人召募義兵協助大軍征進于
當年九月內完復城池用心守禦至正十三年跟
隨福建道帖古迭兒克復婺源州治驗功擢充太
白渡巡檢繼蒙江東廉訪司體勘相同移牒本路
檄申省府移咨中書省定奪去訖至正十六年正
月二十四日賊人復據徽城鄭璉自備已財召募
義兵三百五十名跟同官軍於四月二十一日克
復城池當月二十八日卑職以浙東道都事自太

平旌德縣前來會合克復州縣城池鄭璉管領所
部義兵隨同卑職征進五月初五日進兵攻擊黟
縣漁亭謁岡賊寨鄭璉就陣射死賊二人割到耳
記生擒賊人二名許壽張深解赴軍前典刑至初
九日又與萬戶也宣海牙統領千戶百戶荅刺罕
軍士義兵一同追襲餘黨克復祁門縣治本人不
願支賞管領本部義兵守禦黟縣無虞在後卑職
陞充僉都元帥爲見鄭璉前後宣力效忠不避艱
險驗功陞充征行都鎮撫出給執照勾當十月內
卑職因病罷政所部獲功人員理宜舉擢優加陞

用准此照得先爲徽州路歙縣尹王質彬病故去
任之後省府將縣丞潘從善陞充縣尹責令撫字
今本官取充行樞密院掾史缺人撫字將鄭璉保
充歙縣尹具呈省府照詳去訖今准前因看詳鄭
璉抱忠義之志挾英邁之才自備已資召募義兵
爲

國効力叅隨征進奮不顧身冒犯矢石前後所獲功
績名著昭彰兼以處事不苟操履廉能似此良才
堪居守令又兼至元十三年歸附之初徽州李世
達叛亂伊故祖鄭徵仕首先獻納城壁全活一郡

驗功差充歙縣尹功德在民至今民懷其惠若將
鄭璉陞充歙縣尹責以撫字委實官民相孚允協
輿情爲此給具呈

江淞等處行中書省伏乞驗詳施行湏至呈者
樞密院陞行軍鎮撫鄭璉尹歙照會

皇帝聖旨裏江浙等處行樞密院所委總制官淞東
道宣慰使司同知副都元帥八爾思溥化准本道
宣慰副使僉都元帥李誠咨呈嘗謂定亂安邦當
奮揚於威武理官輔治在慎擇乎忠良切見鄭璉
年三十七歲本貫徽州路歙縣儒籍係已故本縣

尹鄭徵仕郎之孫休寧縣尹鄭承仕郎之子即今
朝廷徵聘翰林待制奉議大夫鄭子美親弟斯人才
謀出類文武兼能衛兵懷應變之機臨事有高明
之識慈祥愷悌智勇端方昨因至正十二年紅巾
賊人竊據徽城本人召募義兵協助大軍征進於
當年九月內克復城池用心守禦至正十三年跟
隨福建道都元帥克復婺源州治驗功擢充太白
渡巡檢江東廉訪司體覆相同移牒本路檄申去
訖至正十六年正月二十四日賊人復據徽城鄭
璉自備已財召募義兵三百五十名跟隨當職到

於建德路淳安縣威平鎮屯駐征進勦捕三月初
三日賊人透入淳安縣五六都等處殺掠人民初
七日進兵攻破賊寨鄭璉臨陣殺死賊三四名四
月初七日攻破歙縣白石嶺賊寨本人殺賊一名
生擒偽百戶一名牛子俊從賊一名吳復解赴軍
前典刑了當進至深渡賊衆隔溪列陣拒敵鄭璉
爭先過溪迎敵殺賊一名趕至五渡橋生擒偽賊
千戶巴子成奪到旗鼓解赴軍前典刑十八日進
攻大佛等寨鄭璉殺賊二名生擒從賊二名軍前
典刑二十一日進攻徽州城下鄭璉殺賊二名當

日克復城池二十八日本道都事李誠領兵自太平旌德縣前來會捕克復州縣城池繼調管領所部義兵隨同征進五月初五日進兵攻擊黟縣漁亭藹岡賊寨鄭璉就陣射死賊人二名割到耳記生擒賊人二名許壽張深解赴軍前典刑至初九日又與萬戶也宣海牙統領千戶百戶答刺罕軍士義兵一同追襲餘黨克復初門縣治本人不領支賞管領本部義兵守禦黟縣無虞在後都事李誠陞充僉都元帥爲見鄭璉前後宣力效忠不避艱險驗功陞充行軍都鎮撫出給執照勾當十一

月內元帥李誠因病罷政所部獲功人員理宜擢看詳鄭璉抱忠義之志挾英邁之才自備已貲召募義兵爲

國効力參隨征進奮不顧身冒犯矢石前後所獲功績明著昭彰兼以處事不苟操履廉能似此良才堪居牧守爲此切照徽州路歙縣自縣尹王質彬病故去任之後省府將縣丞潘從善陞充縣尹責令撫字今本官取充行樞密院掾史即日缺人其鄭璉故祖鄭徵仕至元十三年歸附之初李世達叛亂鄭徵仕首先獻納城壁全活一郡驗功差充

歙縣尹功德在民至今民懷其惠若將鄭璉陞充
歙縣尹責以撫字委實官民相孚允協輿情除已
備呈

省院鈞詳定奪劄付徽州路比及
明降以來先行照會本縣即便禮請之任具到任月
日申來使職合行出給執照依上領職勾當施行
須議出給執照者

右執照付徽州路鄭璉准此

至正十七年二月

日

押

元故歙尹希貢鄭先生墓誌

公諱璉字希貢姓鄭氏世居歙之雙橋曾祖諱文政
祖諱安當元初以全城功廟食於里父諱千齡歷官
至休寧尹操守廉介歿謚貞白先生因名其里母汪
氏生母鮑氏年未髫鬢而休寧尹卒謹事孝廉先生
儼若嚴君為人不羈世故倜儻有器量雖生儒家不
減將門子弟驍勇威猛臨陣善機變與休寧吳克敏
結為死友以身許之元至正十二年斬賊據郡城公
年三十有七與兄璿傾貲募兵協助大軍克復城池
十三年以復婺源州功受太白渡巡司十六年郡城
復為賊據公又與兄璿傾已貲募義兵同官軍夾攻

賊潰乘勝追擊賊寨克復黟祁二縣元帥李誠以其
功呈樞密院陞充行軍都鎮撫十六年予轉漕任邑
乏撫字官元帥八爾思公薦公為歙縣尹冰清玉潔
政聲卓然署事九月兄師山命辭之十七年城再陷
主將鄧愈聞其兄師山名欲要致之師山從容就死
囑公屈志以存宗祀公歸其喪於家遵治命葬於休
寧廟嶺虞祭卒哭咸中禮度執紼千人莫不悅先是
嘗謂從善曰吾生代汝政吾死汝辭誌墓乎蓋志士
不忘在溝壑也明年或以公訃聞時同縣尹葉公郡
博士孫公送葬西王村山陽公嘗愛是山形如落地

梅花遺言夫婦合葬於此契家生鮑深以山與勢家
相鄰遺孤未滿八歲世值干戈鄉曲尚力滅絕理法
苟不豫啻雖誌無補即集鄉老明立界限南橫六丈
北增其二東西倍之四焉穿壙于中面丁背癸生以
元延祐四年丁巳四月初一日卒以至正二十年庚
子九月初十日享年四十有四歲娶王干洪氏蚤卒
繼程氏子一人拱辰女一人鈞姑配潭濱黃志公生
平好直言勇為義偽漢遙拜為萬戶不受自兄卒忠
義沉默恬退口不談兵殫力撫訓孤姪禮二嫂時人
稱曰兄死報

國弟生保家公卒雖死九原猶有生氣從善忝以舊
尹未及告之以政敢不槩書其行鐫於墓側以為陵
谷變遷之備云

至正二十一年辛丑十月

江淞樞密院掾史邑人潘從善謹誌

里人汪仲彰填諱

濟美錄後序

濟美錄者集吾先世之美而錄之也始於
三府君者三府君其顯顯者也繼此未錄
非敢畧也蓋有待也先令君以行誼顯卒
以一言解元人屠城之師郡人義而廟之
歲時尸祝貞白先生持廉介歷官多惠政
有司表厥宅里文貞公明道垂訓而死節
從容史官傳以忠義有餘耀焉祖孫父子

相濟以成其家也猶五味相濟以成味也
五色相濟以成章也大哉美乎足以訓矣
乃若修身隱於家利澤洽於鄉宦業著於
國永樂成化弘治間蓋彬彬然高池府君
肇其基文貞祖父洪其源而諸先輩承其
流謂之濟美者非耶愚嘗讀史傳高陽氏
有才子子八人齊聖廣淵明允篤誠高辛
氏有才子八人忠肅恭懿宣慈惠和君子

曰濟美濟美云先君子未能媲美於元愷
然其以德以功亦足傳焉宗老子西翁恐
其散逸也遂哀馬駕部黃潭先生叙之矣
父兄謂燭宜言於後燭不肖其何以有言
乎無已乃言曰書曰若考作室厥子乃弗
肯堂厥父蓄厥子乃弗克播先世有美而
弗錄非仁孝也有美而弗濟尚得爲仁孝
乎美也者天之命也天之遺也善事天者

事其親而已善事親之濟其美而已濟美
以立德五德以度事度事以獻功是之謂
仁人是之謂孝子反是則爲濟惡爲不才
可弗悔乎茲錄也足以揚先焉足以昭後
焉有仁孝之道焉有勸懲之典焉可以訓
矣爰刻之家塾與宗黨奉以周旋

嘉靖乙未年冬十月望後一日裔孫燭百

拜謹書

This book should be returned to
the Library on or before the last date
stamped below.
A fine of five cents a day is incurred
by retaining it beyond the specified
time.
Please return promptly.

This book should be returned to the Library on or before the last date stamped below.

A fine of five cents a day is incurred by retaining it beyond the specified time.

Please return promptly.

Harvard-Yenching Lib



3 2044 114 463 169